

Gianna Luzio cumenza sco pli auta funcziunaria da la pcd

Betg in simpel job – timunar la partida en l'onn electoral

■ (anr/vi) Las pli impurtantas figuras entaifer ina partida èn il president e la secretaria generala. Gianna Luzio cumenza oz sia nova lavur a la testa dal secreatriat da la pcd svizra. Stefan Engler e Martin Candinas laudan las qualificaziuns da la Surmirana. Luzio portia bleras enconuschientschas en l'uffizi. Ella saja stada assistenta da cusseglier federal *Alain Berset*, haja lavurà en il servetsch parlamentar e possedia bunas raits da contact, di cusseglier dals chantuns *Stefan Engler*: «Ella enconuscha bleras persunas-clav.» Plinavant sappia ella co ch'ils process politics funcziunian e chapeschia la dependenza tranter la partida ed il cussegl federal. Ch'ella discurreia ils quatter linguatgs naziunals saja in ulteriur avantatg per tgirar bunas relaziuns cun las secziuns chantunals.

Quieta e betg partischant

«Ella porta ina tscherta quietezza en il secretariat», di Engler da sia personalitad. Luzio na sa laschia betg agitar uschè svelto. Ella haja il dun da tadlar tiers e na saja betg partischant. L'incumbensa saja fitg pretensiusa. Ins stoppia tegnair ensemen las alas da la partida ed era las tendenzas en la Svizra franzosa ed en la Svizra orien-



Gianna Luzio, la nova secretaria generala da la pcd svizra. MAD

tala. «Quai è in spagat ch'ins sto pudair tegnair or», di il politicher surmiran. I saja in servetsch en loialitad envers la partida. Ina secretaria generala stoppia ir enturn precautamain cun infurmaziuns

che forsa mo ella possedia. Ella stoppia exequir e coordinar las decisiuns dals gremis. Il success vegnia lura mesirà vi dals resultats d'elecziun. Suenten che la pcd ha pers pliras giadas sezs tant sin nivel chan-

tunal sco federal na saja quai betg uschè simpel da surpigiar questa responsabladad, conceda Engler. «Ma igl è er ina schanza per novas fatschas cun novas ideas.»

«Grond numer»

La nova incumbensa da la Surmirana saja da manar il secretariat cun tut ils col-lavurats scientifics ch'elavureschian consultaziuns ed accumpognian las fatschentas politics, di *Martin Candinas*. Plinavant vegnia vitiers la lavur cun las medias e la reclama. Gronda lavur vegnia er a dar l'iniziativa da sanadad che la pcd lantschescha en l'onn electoral. Tar la lavur da mintga di semtgar sesidas per il presidi, la suprastanza e las radunanzas da delegads.

«Igl è in uffizi variant cun ina gronda responsabladad», di Candinas. La secretaria generala saja «in grond numer» en la partida.

Il cusseglier naziunal enconuscha ella anc da ses temp sco president da la pcd giuvna cura che Luzio è stada suppleanta en il cussegl grond. «Jau sun persuadi ch'ella vegn a far buna lavur», di Candinas.

Tenor comunicaziun da la pcd è Luzio stada confundatura dal Festival Cultural Origen e vicepresidente dal Parc Ela. Oz s'engascha ella sco commembra dal cussegl da fundaziun dal Museum alpina a Berna. Ils ultims onns ha *Béatrice Wertli* dal chantun Argovia timunà il secretariat da la pcd.